


關中金石記
一



關中金石記

一



關 中 金 石 記

(一)

畢 沅 撰

敘

余生平未嘗至關中。聞有所謂碑林者。末由見也。數十年前。有人從長安來。叩之。則大率在榛莽中。雨淋日炙。不加葺治。甚且衆穢所容。幾難厠足。蓋未嘗不慨然興歎也。鎮洋畢公前撫陝之二載。政通人和。爰以暇日訪古至其地。顧而悚息。於是堂廡之傾者圮。亟令繕完。舊刻之陷於土中者。洗而出之。開成石經。多失其故第。復一一加以排比。於外周以闌楯。又爲門以限之。使有司掌其啓閉。廢墜之久。劇然更新。儒林傳爲盛舉。及公之復莅秦中也。乃并哀各郡邑前後所得金石刻。始於秦。訖於元。著爲關中金石記八卷。考正史傳。辨析點畫。以視洪趙諸人。殆又過之。夫人苟趣目前。往往於先代所留遺。不甚愛惜。而亦無以爲後來之地。儒生網羅放失。亦能使古人之精神相煥發。而或限於其力之所不能。必賴上之人寶護而表章之。以相推相衍於無窮。其視治效之僅及於一時者。相什伯也。公之於政也。綽有餘力。故能百廢具興。卽此亦其一也。自國朝以來。爲金石之學者。多於前代。以余所知。若崑山顧氏炎武。秀水朱氏彝尊。嘉興曹氏溶。仁和倪氏濤。大興黃氏叔璚。襄城劉氏青芝。黃岡葉氏封。嘉興李氏光映。邵陽褚氏峻。錢塘丁氏敬山。陽吳氏玉搢。嘉定錢氏大昕。海鹽張氏燕昌。皆其選也。繼此者方未有艾。得公書而考之。庶幾古今人之精神命脈。不至中絕也乎。乾隆四十有七年季冬杭東里人盧文弨敘。

金石之學。與經史相表裏。側菑異本。任城辨於公羊。憂昊殊文。新安述於魯論。歐趙洪諸家。涉獵正史。是正尤多。蓋以竹帛之文。久而易壞。手鈔板刻。展轉失真。獨金石銘勒。出於千百載以前。猶見古人真面目。其文其事。信而有徵。故可寶也。關中爲三代秦漢隋唐都會之地。碑碣之富。甲于海內。巡撫畢公。以文學侍從之臣。膺分陝之任。三輔漢中上郡。皆按部所及。又嘗再領總督印。踰河隴。度伊涼。跋涉萬里。周爰咨詢。所得金石文字。起秦漢訖于金元。凡七百九十七通。雍涼之奇秀。萃于是矣。公又以政事之暇。鉤稽經史。決擿異同。條舉而件繫之。正六書偏旁。以糾冰英之謬。按禹貢古義。而求漢濬之源。表河伯之故祠。紬道經之善本。以及三藏五燈之祕。七音九弄之根。偶舉一隅。都超凡諦。自非多學而識。何以臻此。在宋元豐中。北平田概嘗撰京兆金石錄六卷。其書雖不傳。然陳氏寶刻叢編屢引之。揆其體例。僅紀撰書姓名年月。初無攷證之益。且所錄不過京兆一路。豈若斯記。自關內山南河西隴右。悉著於錄。而且徵引之博。辨析之精。沿波而討源。推十以合一。雖曰嘗鼎一臠。而經史之實學寓焉。大昕於茲事。篤嗜有年。嘗恨見聞淺尠。讀公新製。如獲異珍。它日按籍而求。以補藏弃之闕。則是編爲西道主人矣。辛丑歲七月。錢大昕序。

關中金石記目次

卷第一

秦二。漢十三。魏二。晉一。秦一。北魏四。周三。隋十二。石三十五。瓦三。

卷第二

唐六十九。金二。石六十七。

卷第三

唐一百三。

卷第四

唐一百七。梁二。後唐二。晉二。周一。

卷第五

宋一百廿一。金二。石一百十九。

卷第六

宋二百。金二。石一百九十八。

卷第七

金五十五。金四。石五十一。附劉豫五。

卷第八

元一百三。金三。石一百。

計金十三。瓦三。石七百八十一。共七百九十七。以乾隆辛丑歲七月開雕。九月刻竟。沅并識。

關中金石記卷第一

秦

清 鎮洋畢 沅撰

繹山碑 李斯篆。在西安府學。

秦刻不傳。此卽宋徐鉉所摹。淳化四年太常博士鄭文寶所刻。未有文寶跋。史記稱始皇廿八年東行郡縣。上鄒嶧山立石。卽此。繹記作嶧。金石刻因明白矣。作刻石因明白矣。中動作動從童。與婁壽碑固不動心字同。又校官碑董並街彈碑以府承董察古文尙書董之用威。董皆作董。檀弓鄰重汪錡。注重當爲童。張公神碑仙僊卽仙童。古重與童本通也。或作戎。从十。十古文甲字。戎早等字因之。攸作攸。說文解字曰攸行水也。從支人水省。秦刻石作攸。今此作攸。蓋用水省之意。優於許而與攸則不相合矣。親巡作親軻。說文又曰親至也。軻車約軻亦古字通也。又強作強上變口。專作專中變田。建作隼下變乚。數作數譌。串爲胃。襲作襲譌。亓爲巨。者作詈省右筆。德作德省中筆。此皆於六書之正不合。或是古本磨泐。鉉臨寫時以意增改未可知。又壹作壹。金作金。亂作亂。極作極。逆作逆。此雖互異。猶未失籀篆之正者也。碑於明時中斷。

瓦當字 一曰衛二曰蘭池宮當。長安志又有楚字瓦。云秦作六國宮室於咸陽北坂。用國號別之。考當時衛最後亡。此瓦應卽其時造也。蘭池宮遺址。今亦在咸陽。

漢

漢中太守鄒君開石門道碑 永平六年刻。分書。在褒城北石門。

字徑三四寸。體界篆隸之間。甚方整。而長短廣狹不一。余所見漢人書。若諸城縣署內延光四年刻石。亦此類也。其文云。永平六年。漢中郡以詔書受廣漢、蜀郡、巴郡徒二千六百九十人。開通褒余道。太守鉅鹿鄒君。部掾治級王宏、史荀茂、張宇、韓岑弟其功作。太守丞廣漢楊顯將相。始作橋格六百二十三。大橋五。爲道三百五十八里。郵亭驛置徒司空褒中縣官等。并六十四所。凡用功七十六萬六千九百。瓦卅六萬九千八百。共計一百二十四字。合之宋晏褒所云一百三十九字。共少十一字。當是所紀歲月也。褒文中似又有永平九年四月字樣。或此剏始於六年。成於九年後。刻此石也。中褒斜作余。橋閣作格。並古字通。

敦煌太守裴岑紀功碑 永和二年八月立。隸書。在鎮西府北關關忠義廟。

岑。漢書無名。西域傳云。漢自陽嘉以後。朝威稍損。諸國驕放。轉相侵伐。蓋當時車師內附。呼衍每與爲難。中國屢發諸國兵討之不利。岑爲太守。以本郡兵三千扞禦。能克敵全師。故自紀其功若此。

楊孟文石門頌 建和二年中冬立。隸書。在石門。

碑云。楊君厥字孟文。故水經注稱爲楊厥碑。考之華陽國志。則楊君名渙字孟文也。洪适云。厥實語助耳。非名。文內有云。高祖受命。興於漢中。道由子午。出散入秦。以子午塗路。盡難更隨。圍谷復通。堂光說。與鄱閣頌。嘉念高帝之開石門。元功不朽云云。合出散入秦者。散關也。碑爲漢中太守榘爲武陽王升立。以榘爲榘。引古字。說文無榘字。

蒼頡廟碑 隸書。在白水黃龍山廟內。

是碑圭首。上有穿。文甚磨泐。惟蒼頡天生德于大聖。四目靈光。數字可辯。其陰多曹字。蓋是當時人題名。如兵曹。冑曹。賊曹之類。兩側甚明晰。有永壽二年延熹四年字樣。側又有記。故有大聖之遺靈以示來世之及下行。因紀姓名等說。其云萬年左鄉有秩。萬年北鄉有秩。蓮勺左鄉有秩。池陽左鄉有秩者。則是是方民衆之有爵秩者。司馬彪百官志以爲三老游徼嗇夫之屬也。趙明誠以爲熹平中立。余案碑側已有永壽年號。則非熹平可知。

西嶽華山廟碑

此碑世有兩本。一爲商邱宋氏肇所藏。一爲華州王宏撰所藏。皆宋搨也。宋氏本。雍正初姜任修摹刻于揚州。郭本今爲曲阜孔繼涑所刻。兩本字殘泐處悉同。世又有所謂全本。則不足信。

開西狹頌 建寧四年六月刻。隸書。在成縣。

文云。漢陽阿陽李君諱翕。字伯都。漢陽前漢爲天水郡。永平十七年更名。後有黃龍嘉禾白鹿承露人木連理五瑞圖。圖後云。君昔在黽池。修肴嶽之道。致此瑞。因其地異。故洪氏分爲二碑。實非也。肴阪謂之肴嶽者。因公羊傳以爲嶽巖故也。考說文亦謂之岑峯。諱翕。歐陽修所爲會非。

造郿閣頌 建寧五年二月刻。隸書。在略陽。

此碑刊于崖上。自宋時已泐。今更甚。明申如埴翻本。惡劣不堪。兼多增改。好古者爲所惑亂。今特以洪文惠隸釋所載者辯之。序內濤波滂沛。滂誤作滴。減西□□增作減西濬□□□增作臣蠡□□頌內□□□增作上帝綏□愛民如□□□平均增足子遐邇三字。豐稔□□□樂增足年登居民四字。□□□今川兌之間。增作曰析里之□川兌之間。□□□以析分增作西隴鼎峙。今東以析分。聖朝閔憐。憐誤作憐。毳艾究□今幼□□□校傾兮全育□遺。改作分苻杭懷兮乃命是君。□歷救傾兮全育□遺。黃邵朱龔兮蓋不□□□充贏兮百姓歡欣。改作拯溺亭屯兮瘡痍始起。閭閻充盈兮百姓歡欣。豈有洪氏不能見其全。而今反明晰且顯。與洪氏兩異者。于以知明時人之誣妄若此。

碑後題從史□□□□字漢德爲此頌者。隸續云。天井道碑題名內有仇靖字漢德。故吏下辨□□

□子長書此頌者。天下碑錄云。仇子長名紉。撰書人著名自此始。華山碑有郭香察書。洪适以爲察人之書。非以香察爲名也。

司隸校尉楊淮碑。熹平二年二月立。隸書。在石門。

淮。孟文之元孫。字伯邳。

郃陽令曹全紀功碑并陰。中平二年十月立。隸書。在郃陽。

後漢書西域傳云。靈帝建寧元年。疏勒王與漢大都尉於獵中爲其季父和得所射殺。和得自立爲王。三年。涼州刺史孟佗遣從事任涉將敦煌兵五百人與戊己司馬曹寬西域長史張晏將焉耆龜茲車師前後部合三萬餘人討之。攻楨中城四十餘日不能下。引去。其後疏勒王連相殺害。朝廷亦不能禁。今碑云。和得殺父篡位。君與師征討。和得面縛歸死。傳無面縛歸死之文。此應從史。碑附會言之耳。所稱和德卽和得。得與德通。寬亦卽全。全與寬通也。

仙人唐公房碑。年月並缺。隸書。在城固壻鄉。

水經注云。公房。城固人也。升仙之日。壻行未返。不得同階雲路。約以此川爲居。因號曰壻鄉。壻水亦卽名焉。今案此碑。稱公房以王莽居攝二年與真人期于壻谷口山上。則是公房未升仙之日。其水與鄉已號曰壻矣。并無壻行未還之說。道元不知何所據也。

武都太守等題名殘碑 無號年。隸書。在華嶽廟。

右題名共七行。云民故武都太守□□躬尋節。故功曹司隸茂才司空掾池陽郭咥公休。故功曹司空掾池陽吉華伯房。故功曹司空掾蓮勺田巴叔鸞。故功曹司空掾池陽吉充叔才。故功曹大尉掾頻陽游殷幼齊。故功曹大尉掾池口吉苗元裔。一人爲一行也。首行下有故督郵三字。次行下有故五二字。三行下有故一字。稽其官制地名。是漢時碑陰無疑。然攷隸釋隸續及金石集古等錄。並無此刻。乾隆四十四年。修理嶽廟。五鳳樓下所出古碑殘石甚多。此爲稱最焉。

十三字殘碑 隸書。在郃陽。

今在郃陽康姓。宰辛退食記云。十三字碑向置曹全碑之旁。今亡矣。不知爲康姓移去耳。

瓦當字

右共十五種。並篆書。一曰延年益壽。二曰千秋萬歲。三曰長生未央。四曰長生無極。五曰長樂未央。六曰與天無極。七曰億年無疆。八曰益壽存富。八曰都司空瓦。十曰宗正官當。十一曰右空。十二曰上林。十三曰上林農官。十四曰永奉無疆。十五曰長毋相忘。李好文長安志圖說。載有七種。今無儲胥未央。萬壽無疆二種。而別出者。又得九種。可見古物之未經前人見者猶多也。宗正宮。高帝七年二月置。

魏

盪寇將軍李苞題名 景元四年十二月立。隸書。在石門中。

文云。景元四年十二月十日。盪寇將軍浮亭侯譙國李苞。字孝章。將中軍兵石木工二千人。始通此關道。苞字作苞。前有潘宗伯韓仲元題名一行。亦隸書。其歲月莫可考。附置于此。

十八字殘碑 隸書。在郃陽。

今在郃陽屈姓。中有黃初五三字可辨。

晉

蘭亭序 永和九年三月王羲之行書。在咸陽。

此卽醴泉荀氏本。今爲咸陽人所有。後有董其昌跋。蓋明時所刻也。

秦

廣武將軍□產碑 建元二年十月立。分書。在宜君。

文有云。使持節冠軍將軍益州刺史上黨公之元孫。又云。建忠將軍□□護軍扶風太守遷□匡侯之□子諱產字下缺。又有與馮翊護軍云云。皆未詳其事蹟。上有雒作立□山石祠五字。又有陰刻部將姓名。

北魏

石門銘并序 永平二年己丑正月立。王遠撰文并正書。在石門中。

遠無書名。而碑字超逸可愛。又自歐趙以來不著錄。尤可寶貴也。序文有云。此門爲漢永平中所開。卽指鄒君事言之。鄒君爲漢中太守。甚有功于民。而史志家皆不載其人。碑又遺其名字。余甚惜之。

曹續造象銘 大統五年二月立。隸書。

文云。見治富平令曹并。邑子三十四人。案其左方有造象人名。大槩卽邑子三十四人也。有一人亦並作一像。曹時封頻陽縣開國男。

造象殘刻 無號年。隸書。並在富平。

右刻與曹續造象制度略同。皆列魏姓人名。一人亦各爲一像。因無歲月可稽。附置于此。

松滋公元萇振興溫泉頌 無年月。正書。篆額。在臨潼溫泉觀。

碑額三十六字。字體奇詭。不知所自。云魏使持節散騎常侍都督雍州諸軍事。西安將軍雍州刺史松滋公河南元萇。振興溫泉之頌。萇于孝文時以代尹除懷朔鎮都大將。宣武時爲北中郎將。帶河內太守。歷侍中雍州刺史。是碑所作。當在宣武時也。本傳稱萇襲爵松滋侯。例降侯。賜艾陵伯。降侯爲伯。在孝文大統十六年。是碑仍稱松滋者。當是尊崇其世爵。故不及其所降之爵也。亦俗情如此耶。

周

聖母寺四面象銘 保定四年九月立正書在蒲城東北鄉二十里

豆盧恩碑 隸書在咸陽洪濱原

碑無號年以文內有保定元年之語故附置于此

華山神廟碑 天和二年十月立萬紐于瑾撰文趙文淵隸書篆額在華嶽廟

周書唐瑾本傳瑾封姑臧縣子進爵臨淄伯論平江陵功進爵爲公于志寧撰瑾碑乃言封永昌子不及姑臧周書亦彼時所撰何兩異耶文稱太師大冢宰晉國公者宇文護也碑中虞書字作炆見左傳正義云石經古文作炆清歌字作哥見說文云古文以爲歌字惟旃蒙字作旡則不言其義攸字从彳作攸暇字从目作暇是時書體徧旁之謬類如此

隋

佛座記 開皇四年九月立正書在西安府城北雷神廟

淮安定公趙芬殘碑 開皇□年十二月立正書撰書人姓名缺在西安府城東中兆村

安喜公李使君碑 開皇十七年二月立隸書篆額撰書人並缺在乾州上官村

使君涼武昭王之後祖景超父通逸季父琰之通逸官至使持節東南道都督狄道縣開國子官亦不卑而名氏不見于史記獨琰之魏書有傳因知史家缺略爲多也碑三截字畫工好使君名缺不詳

海陵郡公賀若誼碑 號年缺。正書。無撰書人姓名。在興平縣學。

隋書本傳。誼在魏。以功臣子。賜爵容城縣男。遷直閣將軍。大都督。通直散騎常侍。尚食典御。在周。拜車騎大將軍。儀同三司。略陽公。府長史。除司射大夫。封霸城縣子。轉左宮伯。加開府。歷靈邵二州刺史。原信二州總管。尋罷。復熊州刺史。遷洛州。封建威縣侯。進位大將軍。拜亳州總管。進封范陽郡公。授上大將軍。在隋。爲右武侯將軍。河間王北征。爲副元帥。轉左武侯大將軍。免。拜華州刺史。轉敷州。改封海陵郡公。轉涇州。拜靈州。進位柱國。碑敍次往往與本傳合。誼之加開府。在周閔帝受魏禪之後。碑云三年。者。當是明帝武成三年。其治熊州。在武帝時。碑云建德年。較傳更明晰。但不及坐兄敦及左武侯後兩次免職事耳。碑文下半截殘闕。

舍利塔銘額 仁壽元年十月立。隸書。在大荔。

今銘已失。只此額存。上有楊繼宗等題名。

唐高祖爲子祈疾疏 大業二年正月立。正書。無姓名。在鄂縣草堂寺。

高祖于隋歷譙、隴、岐三州刺史。大業中。爲滎陽太守。此云鄭州刺史。當卽是守滎陽時所造。

鷹揚郎將義城子梁羅墓志 大業四年八月立。正書。在西安府城南杜曲。

舍利塔銘 大業五年正月立。正書。在終南山。